



UKA16/46

6. oktober 2016

Kelly Berthelsen

### **Kalaallit eqqumiitsuliaannut nunatta eqqumiitsulianik saqqummersitsiveqalernissaa pillugu Naalackersuisut peqquneqarnissaannik Inatsisartuni aalajangiiffigisassatut siunnersuut.**

(Inatsisartunut ilaasortaqaq Muté B. Egede, Inuit Ataqatigiit )

Eqqumiitsulianik saqqummersitsiveqalernissaaq pillugu siunnersuut imaattumik Inuit Ataqatigiinniit oqaaseqarfigissavarput.

Eqqumiitsuliorneq inuiaqatigiit kinaassusiannut pingaaruteqaannarani kulturiannut kinaassusiannullu tunngaviliisut ilagilluinnarpaat. Taamaamat sulluunniit eqqumiitsuliornermut tunngasut tapersersussallugit tassuunakkut pissutissaqarluarpugut.

Nuna namminersorumasoq sutigut tamatigut oqaluttuarisaanini pillugu ilisimasanik katersuisariaqarpoq, aamma eqqumiitsuliornikkut oqaluttuarisaanermut tunngasunik.

Ullunili nutaani nunarsuarmioqatigiit imminnut qanilliaruinnarfianni eqqumiitsuliorneq inuussutissarsiornikkut takornariatitsinikkullu immi immikkut pingaaruteqalersimavoq.

Eqqumiitsuliat killeqarfiit pitarlugit imminni immikkut tunisassiannngorsimapput. Pingaartumik nunat takornariarfiulluartartut nunaqavissut eqqumiitsuliaannik tuniniaanikkut isertitaqarluartarput. Eqqumiitsuliat assigiinngitsunik pitsaassuseqarsinnaapput. Ilaat tammajuitsussaananguusarput alutornartorsualiaanatik, ilaalli eqqumiitsuliavissuusarput immikkuullarilluinnartut. Takornariammi nunamit tikisaminnit eqqaamasassaminnik immikkuullarissunik peqarusuttarput.

Eqqumiitsuliat allat aamma imminni takornariagassaasarput. Assersuutigeriartigu qalipagaq Mona Lisa. 2014-imi Parisimi katersugaasivissuaq Louvre inuit 9,3 millionit ornissimavaat, katersugaasiviullu pisortaata naliliinera naapertorlugu taakku 80%-iisa Mona Lisa piinnavillugu isertarput. Tassa qalipagannguilluunniit nunap pingaartumik takornariatitsinermik napaniuteqarluarfiusup aningaasaqarneranut assut pingaaruteqartarput.

Aamma eqqumiitsulianik saqqummersitsivik immi eqqumiitsuliornerup ineriartortuarnissaanut pingaaruteqarpoq eqqumiitsuliortunngorumasut eqqumiitsuliortunngortullu



isumassarsiorfissaminnik ornigassaqaqarnermikkut eqqumiitsuliornissamut kajumissuseqaqarnerulissammata.

Naatsumik oqaatigalugu eqqumiitsulianik saqqummersitsivik inuiattut kinaassutsitsinnik tammatsaaliinermut, ineriartortitsinermut, kiisalu inuussutissarsiornermut takornariartitsinermullu, kiisalu aammalu eqqumiitsuliornerup ineriartorneranut pingaaruteqaqarluinnassaaq.

Sanaartortitsisuuneq eqqarsaatigalugu sanaartornermut pilersaarusionerlunnikkut sanaartornerup ilimagisamit akisunerulersinnaanera ersissutigineqassappat kajumissaarutiginnassavarput sanaartornermi siunnersortit tutsuuiginartut atorineqassasut sanaartornermullu pilersaarut sukumiisumik suliarineqassasooq. Siusinnerusukkut kukkuluttortarnerit ikinngitsut ilinniarfigereerunnarsigaluaqaavut.

Eqqumiitsulianik saqqummersitsivik aningaasatigut pingaartumilli anersaakkut iluaqutigisussaagatsigu tapersersornissaa pissusissamisuuginnassammat isumatusaarnerummallu Naalackersuisut taama ittumik pilersitsinissananik peqquneqarnissaat soorunami Inuit Ataqtigiinniit taperserparput. Taamaammat ataatsimiititaliamut ingerlateqqinneqarnissaa sukumiinerusumillu misissuiffigineqarnissaa inassutigissavarput.

Kelly Berthelsen Inuit Ataqtigiit.